

DISPUTATIO INAUGURALIS  
MEDICA  
*De*  
PALPITATIONE  
CORDIS.

*Quam*  
D. T. O. M. A.  
CONSENSV & AVCTORITATE  
GRATIOSISSIMAE, atq; EXCELLENTISSIMAE  
FACULTATIS MEDICAE  
*In*  
PERANTIQA ac CELEBERRIMA ACADEMIA  
BASILIENSI

*Pro*  
SYMMIS IN MEDICINA HONORIBVS  
ET PRIVILEGIIS DOCTORALIBVS  
SOLENNITER CONSEQVENDIS

PUBLICO ERVDITORVM EXAMINI  
submittit.

*Ad Diem Jun. Anno M. DC. XCIV.*

JOHANN. VLRICVS FELSIVS,  
Lindavia-Acronianus.



BASILEÆ,

---

Typis, JOH. RODOLPHI GENATHII.



DEO  
PATRIÆ  
FAVORIBVS  
AGNATIS  
PARENTI.







Q. D. B. V.

De

*Palpitatione Cordis Disputatio.*



Itam in motu, & sanguine consistere, jam olim Pientissimus Ethnicorum Vates Seneca pronuntiavit, atque recentissime *splendidum illud Medicorum Lumen Vir Excellentissimus Joh. Jacobus Harderus Philos. & Med. Doct. Anat. & Botan. Prof. Publ. Seren. Principis March. Badâ-*

*Durlac. Consiliar. atq; Archiater, &c. Patronus, Preceptor, ac Hospes summè devenerandus* in eruditâ, quam Literarum Orbi de motu sanguinis Vitali nuper donavit, Dissertatione, ponderosis fundamentis insuper stabilivit.

In foetu sanè fibræ rutilæ primùm conspiciuntur, sanguinem ad punctum saliens, nec dum conspicuum vehentes, ut hoc ipso dehinc pulsitante, vitalitas toti corpori impertiatur: in adultis, atque etiam recens natis, cor continua & æquali sanguinis versùs singulas corporis partes amandatione, vitam machinæ nostræ evidentissimè tribuit, unâque particulas nutritias jugiter transmittere pergit, cruore reliquo vel lymphâ per singularia vascula remeantibus, ac partibus glandulosis aliis ex ejusdem penu, particulas varii generis ac texturæ combinantibus ac secernentibus; ut non



immerito Hippocrates Cor microcosmi solem vocaverit, cum radiis suis, sive hoc ipso motu sanguinis vitali cunctas corporis partes fovere, & in actionibus suis animare videatur; Prout autem Nobilissimæ hujus partis actio, si ad naturæ leges perpendeatur, universæ machinæ conducit; ita è contrario, ubi vel fatiscit, vel activitatis sphaeram excedit, ruinam toti sæpius inferre solet, *ceu Palpitatio Cordis* sola, quam in præsentiarum pro virium modulo ostendere annitar, ostendit.



## §. I.

**N**tequam autem ipsam hujus affectus definitionem aggrediar, præmittam quædam, quæ circa vocis hujus synonymiam notanda veniunt; Palpitatio græcis dicitur *παλμός*, vocabulo à verbo *πάλλομαι* deducto, quod concutere, jectitare, vibrare significat; Latinis idem dicit, ac subsultio, subsilitio, quo verbo ipsum Scaligerum *l. 2. de plant. p. 344.* usum fuisse legimus: Aliis dicitur tremor, sed minus bene, ut in sequentibus videbimus; Lingua nostra vernacula audit, *das Herzklopfen / das Herzkochen.*

II. Homonymiam quod concernit, aliam magnopere non deprehendo, nisi quod ex Autoribus Practicis haud pauci hanc ipsam Palpitationem Cordis promiscuè considerant, & nunc pro Tremore Cordis, sive motu plus justo minori, ac tremulo, nunc pro motu plus justo majori, impetuoso, & vehementi accipiant, licet hi duo motus maximoperè differant, plurimumque intersit, ad hanc ipsam differentiam in praxi attendere.

Definiri



III. Definiri potest Palpitatio Cordis, quod sit vehemens impetuosa, ac iterata ventriculorum cordis vibratio, ejusdemque coni ad basin violenta contractio, à re aliqua, fibras cardiacas irritante, originem ducens ; seu, ut Veteres loquuntur, quod sit motus cordis depravatus, simulque auctus. Patet proin affectum hunc *symptoma actionis depravata* esse, cum reapse convulsivi quid in tam violenta, ac inordinata fibrarum contractione musculus cordis perpetiatur, dum à spiritibus impetuosè, ac magna cum contentione irruentibus, in juges contracturas ipsæ præter modum adiguntur, & ad motum restitutionis, seu intermediam quietem vix ac ne vix quidem devenire possunt.

IV. Dico *vix ac ne vix quidem*, cum hic ipse motus suos habeat gradus, & differentias, atque in aliquibus ita fortiter palpitasse cor visum fuerit, ut etiam vicinas costas effregerit, nec minus *aucta actionis* symptoma erit aliis, ubi ad systoles ventriculorum cordis frequentiam attendere placuerit.

V. Partem affectam, sive subjectum quod concernit, principale ac primarium statuo esse *Cor* universim, hocque ipso *cum* auriculas ipsius fibrosas, *tum* fibras ejus musculosas, & carneas, cum intertextis copiosis nerveis intelligo, soletque causa irritans, nunc primum in *has*, nunc in *illas* agere : nempe musculus est *cor*, & sanguinis in totum corpus dispensationi à summo Opifice destinatum, atque ob hoc ipsum fibris motricibus densè conglomeratis instructum, animalium spirituum necessariâ cohorte per nervos accedente.

VI. Est verò cordis actio duplex, *una* quâ sanguinem è vasis venosis refluxum, inque suos thalamos receptum, ulterius propellit ; *altera*, quâ eundem ex auriculis effusum recipit : *illa* fit ope dictarum fibrarum



musculofarum, spiritus animalis beneficio strenuè sese contrahentium, & cruorem, qui stimulasse quoquomodo potuit, & illius elasticitatem intendisse, continuò evibrantium : *Hæc verò earundem relaxationem insequitur, quâ pristinum, si ita loqui fas est, tonum recipiunt, atque à turgescencia ventriculi quasi quiescunt. Vide sis suprâ jam laudatam Dissert. Viri Excellent. Joh. Jac. Harderi Præceptoris mei æternum colendi.*

VII. Hinc minus difficilè videtur explicare, in quonam Palpitationis *ratio formalis* consistat; enim verò cum solitam vibrationis sphaeram transgrediatur, necesse est omninò, ut ventriculorum fibræ in crebriores, easque vehementiores contractiones adigantur, hisque ad se invicem propius adductis, mucro pectus fortiter feriat; adjungit Clar. Dom. *VWillis*, evibrationem aliquam, quæ contingat à vasorum radicibus ad summum impletis, atque hinc cum impetu quodam exilientibus, sanguine omni, qui in sinus effusus fuit, cum quadam contractione non expulso, sed vel hærente, vel versus basin regurgitante, sicque noviter affluenti, vias præcludente, quod equidem contingere inficiari nemo potest, ubique autem nova stimulatio requiri videtur, ob quam fibræ cardiacæ, suo naturali tono vix dum restitutæ, in novas evibrationes impetuosè sollicitentur, & hinc maximo nisu, quod molestum est, excutere annitantur.

VIII. Beatus *Valdschmidius* in instit. Med. rational. p. 114. vasa cordi appensa pro subjecto palpitationis cordis etiam accusat: at vero in hisce causâ potius affectus tam molesti latitare, ac hæreere posse videtur, quàm ut adæquatum, ac proximum ipsius *subjectum* dici queant.

IX. Quibus ita præmissis causas *proximas*, & *immediatas*



diatas affectus hujus explicare aggredior ; Equidem Veteres ipsi *has* generaliter per facultatem cordis motricem irritatam exposuerunt : *Alii* Archeum in corde residentem irritatum , ac turbatum accusarunt , atque hi omnes verbis magis , quàm re ipsa sciendi avidos detinent. Liceat mihi dicere , quodcunque fibras cardiacas , five *musculares* , ( parenchyma cordis appellant alii ) five *nervos cardiacos* , horumque furculos , vehementer stimulans , & ad evibrationem continuam , atque inordinatam adigens , &c. palpitationem proximè ciere , ac producere posse , cujusmodi causæ , vel in *corde ipso* ac hujus thalamis hærent , vel in *vasis eidem* appensis stabulantur , vel denique *extra illud* constitutæ sunt.

X. In Corde, hujusve ventriculis , ejusmodi incommodum faceßere potest *sanguis* maximè : quando non tam *copiâ* peccans , quàm *particulis luxuriantibus* prægnans insuper , in thalamos cardiacos copiosè , & cum impetu quasi irruit , fibrasque ad vehementem sui constrictionem incitat , quâ si non omnis , qui influxit , excutitur , accedente novâ ex auriculis quantitate , ilico in novas vibrationes se accingunt , & aliquâ ejus portione versus basin , ac auriculas redundante , palpitatione vehemens oritur , cujusmodi violentiâ costas vicinas diffractas , aut dislocatas fuisse supra innui , auditui sanè , visui , & tactui *hæc ipsa* sese faciliè offert.

XI. Effectum eundem edere solet sanguis in orgasmum pronus , fervidus , ac faciliè fermentescens , utpote , qui non solùm motum majorem levi de causâ consequitur , sed particulis irritativis instructus juxta , fibras in vehementiores corrugationes jugiter adigit , sicque unâ spasmodici quid inducit , ipsamque animale auram in crebriores explosiones sollicitat : Ejusmodi  
quid



quid patiuntur, quos hypochondriacæ passioni obnoxios videmus, aut etiam foeminæ hystericis pathematibus addictæ, scorbutici item, sanguine singulorum sale plus minus volatili, acido, acri, &c. referto: Nec verò præter tationem Clariss. Willis in spasmodica hac passione, arteriis cordi appensis, culpam aliquam tribuendam suspicatur, si forte hæ obstructæ, aut fibrarum suarum ope arctius constrictæ, sanguini, quem cor expellere nititur, liberum ingressum denegent.

XII. Nempe *sanguis* ejusmodi acris, particulis suis pungentibus non modo vellicat, sed acido, quo turget, sale, ad coagulationem, ac grumescentiam proclivis est, unde cùm in cordis ventriculis, tum arteriarum radicibus, obstructio gravis non rarò progignitur, itidem *sanguinis* liberum, ac necessarium com meatum sufflamans; pariter ut polypus, aut heterogeneum aliud in corde contentum, noxam talem funestam causantur, atque tum *palpitatio*, morbum organicum, pro causa agnoscere videtur.

XIII. Neque hæc prætermittendus, qui per vasa coronaria affluens, secum impetu in substantiam musculosam cordis diffundit, aut etiam acrior, fibrillas nerveas per hanc ipsam disseminatas, graviter affligit, indeque in ejusmodi vehementes motus, atque explosiones cor sollicitat.

XIV. Utut autem *cùm quantitate*, tum *qualitate* præprimis peccans sanguis, & *mobilis nimium*, affectum istum producere possit, idem tamen ad motum ineptior, lentescens, & vappescens quasi, eundem experientia, & sanâ ratione teste, pari frequentia progignit; enimverò in tali dispositione, omnis, qui quâvis diastole ingestus fuit, non semper ejieitur, sed partim in sinibus residet, partim stagnare incipit, unde, dum  
levi



levi accedente motu uberius influit, quàm ut subsequente systole expelli queat, circa basin, & vasorum radices magis aggeritur, & non modò ad sæpe dictas vibrationum iterationes cor stimulat, sed partes continentes insuper graviter intumescere facit: Exemplo sunt cachectici, & quæ chlorosi è sequiori sexu laborant.

XV. Clarissimus Etmüllerus *motum sanguinis præpeditum* accusat, Exemplo Foresti l. 17. obs. 1. ubi palpitationem cordis incurrit, qui somnum meridianum capiens tibias nimis constrictas habebat, hisque ipsis laxatis, ab illâ liberatus fuit; quamvis autem experienciâ constet, arteriam in membro ligato fortius pellere, quia tamen ejusmodi constrictiones sæpius etiam dolorosæ sunt, fluidi animalis irritatio prorsus hinc rejicienda non videtur.

XVI. Difficilius quoque explicare est, qui sanguinis defectus, effectum tam molestum in præcordiis excitare valeat, ceu exemplum suppeditat Excellentiss. Schellhammerus Epist. de pulsu pag. 67. Puellæ 19. annorum, epilepsiâ laborantis, quæ diebus quindecim, quibus decubuerat, vix tantum cibi vel potus assumerat, quantum alia soleret in leviculâ cenâ, adeoque non poterat jam esse instructa multo sanguine, & tamen vehementissimas palpitationes cordis quovis paroxysmo patiebatur; at verò ipse hic Vir Clariss. subnectit ac confitetur, à nervorum fluido plurimum cordis naturalem motum turbari posse.

XVII. Præter fluidi ἀδιάθεσις, variamque intemperiem, etiam partis moventis mala conformatio, huic malo ansam dat, quò præprimis valvularum, papillarumq; carnearum in uno, alterove sinu, majorem duritiem, ac quandoque *osseitatem* referendam censeo, ceu mitrales valvulas osseas planè vidit Excell. D. D. Joh. Jac.



Harderus, demonstrante p.m. Glafero, in cadavere puerili ; constans etenim est cordis actio, cui singulas istæ partes velificari natura voluit, & propter harum texturam læsam, motum ejusdem variè vitari necesse est.

XVIII. In *vasis cordi appensis* causa hæret, dum vel coagulatus *sanguis*, vel *polypus* graviter illa occupat, pariter ut in thalamis cardiacis ipsis Anatome crebrius illos demonstravit, & haud ita pridem in sectione publica, portentum ejusmodi vidi, utrumque sinum implens, & per arteriæ pulmonalis ramos universim expansum; qui autem ejusmodi hospes generetur, fusius hic disquirere instituti ratio non patitur: vide sis quæ de hisce elegantissimè insuperque accuratissimè commemorat Celeberrimus supra jam laudatus Harderus Apiario Observ. LVI. p. 231. quandoque *substantia pinguis*, instar adipis in thalamis cordis aggeritur, & non rarò etiam arteriæ circa radices suas osseam naturam induunt, ex quo utroque affectus iste facilè pullulat.

XIX. Ex iis, quæ *extra cor* existentia, affectum hunc inducunt, aliqui *flatus* pericardio inclusos assument; at verò causam hanc pariter raram esse arbitror, atque pericardii *vermes*, quos alii adducunt, quorum observationes irritas reddere, ego sufficiens non sum: *tubercula*, vel alia cordi, aut etiam pericardio præter naturaliter accrescentia, multò evidentius, ac probabilius suam efficaciam ostendunt, quam etiam *Pericardii liquori*, ab aliquibus attribui sæpe numero video; prout enim iste, si blandam suam naturam servârit, commodum lubricare, & cor in suo motu, quovis modo juvare, ita si particulis acribus, ac membranam cordis vellicantibus saturatus fuerit, idem turbare, & in graves *æquas* spiritus concitare potest, quod ipsum à Lympha pericardii exundante provenire, Galenus author est, l.v. de loc. affect.

XX. Cau-



**XX.** *Causas antecedentes*, vel *Mediatas remotiores* quod concernit, cùm jam superius affectum hunc nervis cardiacis immediatè affectis, subsequi statuerim, dubium non est, quin affectiones spasmodicæ aliarum partium, cum quarum *nervis* arctissimam communionem, & affinitatem illi habent, *harum* nomine accusandæ veniant, sicque palpitatione per consensum, ut loquuntur, oboriat, ceu fieri potest, in gravi *Cardialgia*, *verminosa dispositione*, hysterice, nephritice, scorbutice, &c. pathematibus.

**XXI.** Pariter *antecedentes causæ* vices sustinet prævia, varia sanguinis dispositio, ac temperies, dum *ille*, vel acris nimium, mobilis, ad fermentescentiam pronissimus, vel è contrà, vappidus, lentescens, acidus, ac vitiosus in toto corpore abundat, talisque vel à primâ infantia existit, vel succedente ætate magis, magisque fuit generatus, & cumulatus, causis procatacticis, & externis suum calculum strenuè huc conferentibus, quas recensere jam aggredior, ubi modò addidero, quæ de ætatis & sexus varietate, quorum ratione, adolescentibus, ac juvenes præ infantibus, ac senibus, foemina præ viris huic affectui obnoxii dicuntur, authores Practici commemorant, maximam partem, varianti sanguinis ejusmodi dispositioni, &c. adscribenda esse.

**XXII.** E causis externis 1. nomino *aërem*, si vel *igneus* ille fuerit, & M. H. velociter exagitare aptus, verus præprimis etiam, & autumnalis, miasmatis fermentativis inquinatus, vel *frigidus* magis, & borealis, particulis suis rigidis sanguinis motum figens magis, aut crassus, ventosus, paludosus, vel etiam particulis metallicis, arsenicalibus, aut deleteriis aliis infectus.

**XXIII.** 2. *Cibum & Potum*, quæ cùm quantitate,



tum qualitate peccant, quando cibi vel sunt craffi, flatulenti, acidi, austeri, faliti nimis, & muriatici, verbo mali succi, & difficilis digestionis, vel si sunt calidi, acres, & facilè corrumpuntur aut fermentescunt, vel etiam chylum viscidum, salsum, & acidum, vel acrem magis, qui sanguinem ad orgasmum disponit, suggerunt. Sic legimus à cinnammomi frequentiore usu palpitationem fuisse ortam, quod ipsum alia quoque fortiora aromatica præstare possunt, in illis maximè, quorum sanguinis textura rarior est, & à levi accedente stimulo in majorem impetum concitatur. *Vinum* etiam haud parum huc contribuit, imprimis recens, & quod per fermentandum nondum defœcatum est, sulphuratum item, vel generosum nimis, aut contra crassum, multum tartari, secum vehens, aut facilè vapescens, præcipuè, si nimia quantitate ingurgitetur: Spiritus vini, & similibus usus pariter est nocentissimus.

XXIV. 3. *Motum & quietem*, si ille vehemens fuerit, à quo non modo fluidum *cùm* humorale, *tum* animale exagitur, sed etiam chylicationis negotium turbatur, ita ut chylus crudus particulis heterogeneis foetus, citius quàm par est, per sua vasa in M. S. præcipitetur, qui deinceps à sanguine corrigi ac subigi non potest: Quies verò excrementa cumulari facit, sanguinisque visciditati, & ad lentescendum ac stagnandum pronitati fores pandit.

XXV. 4. De *somno* ac *vigiliis* similiter sentiendum, enimvero motus particularum somni tempore mitior est, & ubi nimius fuerit, segnescere, & humores ad lentorem, & coagulationem disponere solet: A' *Vigiliis* autem nimis spiritus animales exagitantur valdè & absumuntur, particulae blandæ & dulces



ces in sanguine acuuntur , & ad acorem incli-  
nant.

XXVI. 5. *Excreta* , & *retenta* , præcipuè ubi illa  
modum excefferint , vel p. n. in corpore detineantur;  
quantum enim humano corpori ex hisce ritè habenti-  
bus , accedit commodi , tantum quoque iisdem malè  
habentibus, infertur detrimenti : exemplum nobis præ-  
bet ipsa palpitatio cordis, à suppresso , vel nimio men-  
suum fluxu oriunda, in *illa* enim sanguinis motu turba-  
to, & naturali ejus fermentatione, vel intestina agitatione  
labefactatâ, ad vappescientiam inclinât, in *hac* verò par-  
ticulis acrioribus saturatur, balsamicis, & dulcibus ex-  
haustis, atquè dissipatis : Pertinet huc quoquè nimius  
Veneris usus , ceu adolescenti contigit apud Hippocr.  
l.3. Epidem.

XXVII. Et 6. tandem *animi pathemata* , quorum  
utique in fluidi nostri conservatione , atque oppositâ  
turbatione magna est vis, ceu ex effuso gaudio, terro-  
re , tristitiâ , aut etiam irâ , affatim constat ; in *istâ*  
sanguis summoperè exagitatur , rarefcit , ac cum impe-  
tu versus exteriora propellitur , in *illis* è contrâ oppo-  
sitos motus subito induit, ferèque intra thalamos car-  
diacos constringitur, atque ocyus coërcitus aliquâ sui  
portione grumescit ; in gaudio verò susquè deque ha-  
bitâ motus regularitate, omnis è sinibus cordis exteriora  
versus ruit, suoque præcordia vitali fluido tantum non  
penitus orbantur , de quibus vid. sis pluribus Clariss.  
Willis. tr. de Brutor. animâ, it. etiam Timæum à Guls-  
denflee l.2. cas. 16.

XXVIII. Cæterum affectus hic facilè dignoscitur,  
cùm ceu jam supra meminî, sensibus externis sese sistat;  
arteriæ enim in collo, & cor in pectore impetuosè pal-  
pilians cerni pariter ac audiri possunt, etiam ab ad-



stantibus , præprimis verò tactui se patefaciunt , manu carpo, vel mammæ sinistræ maximè admotâ, quâ insultus ejusmodi violenti costas ferientes eâ evidentiam percipiuntur , ut manum tangentis non rarò removeant. Id juxta moneo, in arteriis , & hinc carpo , sufficiens palpitationis indicium nos non semper habere , cujusmodi Exemplum præf. Timæus Epistol. 23. commemorat.

XXIX. Præterea ægri hoc affectu graviter detenti, præter dictam cordis violentam motitationem , anxietates circa præcordia persentiscunt , cum respirationis difficultate, & animi interdum deliquiis, inde etiam color faciei immutatur , ut qui modo roseo flore oculos refecerat, in pallidum mox abeat , tristemque luctam fontis vitalis præfagiat.

XXX. Utrum verò tam gravis mali causa immediate in corde hæreat, & quænam illa sit, an verò per consensum illud laboret, paucis exponere operæ pretium faciam : & quidem, aliâ in parte fomitem mali hædere, nervosque aggredi, testabuntur symptomata, quæ cum hypochondriacos (ceu sunt anxietates circa præcordia, inflationes Ventriculi , & abdominis subitæ, murmura, rugitus, ac vellicationes spasmodicæ , & dolorosæ vel in hypochondriis, sinistro præcipuè, &c.) tum scorbuticos vexant , cujusmodi sunt modo dicti insultus spasmodici , sed graviores, in plexibus nerveis splanchnicis , lymphæ item acor in tota Massa conspicuus, lassitudo artuum , ad animi deliquia pronitas, ulcuscula in ore frequentia, &c. In nephritica dispositione dolores acuti circa lumbos, qui in abdomen usquè expanduntur, cum nausæâ, vomituritione , &c. plus minus urgebunt, & ubi Vermes, aut alia materia incongrua intestina , vel orificium Ventriculi rodere inceperit, juxta



juxta dolorem circa scrobiculum cordis insignem, imò non rarò animi deliquium, tormina in imo ventre urgebunt vehementia, & quæ per alvum dejiciunt ægri, sæpenumero pessimum odorem spirant, &c. Ita apud foeminas Chlorosi, vel hystericiis passionibus expositas, alia indicia, hiscè ipsis affligentibus conjungi solita, unà aderunt, de quibus Authores consuli possunt; accedit quod corde sympathicè affecto, plerumque affectus, quorum soboles est, primùm vim suam exercere, neque pari diuturnitate, motus palpitantes affligere soleant, quin datis longioribus intervallis ægris exoptata alcyonia concedant.

XXXI. Porro à sanguinis copiâ, vel repentinâ exæstuatione malum processisse, habitus corporis plethoricus, color faciei roseus, præviis corporis motus vehemens, vel etiam animi exagitatio, cum pulsu magno, celeri, ac concitato, docebunt, pulsu minore, tardo, cum faciei pallore, somnolentiâ, aliisque de sanguinis lentore ac vappescentia magis testantibus: grumescencia verò sanguinis, aut coagulum, sive prævia fluvidi intemperies acida, saliumque similis generis in eodem prædominium (quam ex dispositione scorbutica, vel hypochondriacâ colligi posse, suprâ memini) sive subitaneus terror, multaque animi sollicitudo, aut tristitia confirmabunt, juxta ac alia, quæ polypum etiam comitari solent, viz. coloris in facie immutatio, palpitatio-  
nis vehementia, & pertinacia, levi de causâ noviter sæpe numero infestans, pulsus non rarò intermittens, ac inæqualis, anxietates præcordiorū, lipothymia, &c. si ab acri vellicante, vel verme rodente affectus processerit, subitò, ac impetuosè ægrum invadet, fortè etiam morficationem circa regionem cordis ægri persentiscent: si denique à pericardii lymphâ excedente, hydrocar-  
diam



diam non rarò inducente , ortum sumserit , juxta fluctuationem , ac pondus , quod circa cordis confinia, dum de latere in latus se componunt , percipiunt , de suffocatione continuò imminente, malique gravi pertinaciâ querelas movebunt : tubercula verò adnata , vel cordis malam conformationem conjecturari oportet magis , quàm certò prædicere, utpote quæ non nisi oculari inspectione post mortem edocemur.

XXXII. E quibus singulis , satis , ut reor , patescit, affectum hunc periculosum esse maximè, ac non nisi dubiam prognosin instituendam , eò quod pars nobilissima afficiatur , cujus actione sufflaminatâ & magis, magisque impeditâ, corruere homo necesse habet ; periculi tamen minus portendit , qui causam extra cordis confinia positam agnoscit , aut etiam externam aliquam leviolem , ceu est corporis exæstuatio subita, sanguisque concitator motus , exercitio vehementi accersita : pariter malo à sanguinis exundantiâ oriundo adeò difficilè mederi non est : Ubi è contrà fomes mali in ipso corde hæret, aut hujus vasis, vel involucro, imò majores radices egit , gravius periculum, imò medelæ difficultatem prædicat , quamvis enim exempla dentur eorum, qui aliquandiu palpitatione cordis conflictati sunt , rarissima tamen sunt , quæ felicem eventum probaverunt : inprimis verò coagulum pertinax, aut polypus thalamos occupans, malum incurabile , ac periculosissimum reddunt, pariter uti mala cordis conformatio , aut etiam heterogeneum aliquod ipsi accretum , aut denique pericardii hydrops : Usque tamen ægri derelinquendi non sunt, sed convenientibus medicamentis sublevandi, de quibus jam.

XXXIII. Curam itaque quod spectat , secundum indicationes consuetas *Curatoriam* , *Præservatoriam* , ac  
*Vitalem*



*Vitalem* ea instituenda est ; *Illi* satis fit Affectus, & causæ *hujus* proximæ ablatione, *Isti* verò causæ antecedentis correctione, & si opus est vacuatione, huic verò Virium conservatione : *Sanguis* proin copiâ, vel motu effræni peccans vacuandus, infringendus, exæstuans alterandus, acris edulcorandus, viscidus incidendus, attenuandus, grumescens solvendus, salia acida in eodem prædominantia absorbenda, præcipitenda, *summa* M.H. universa volatilifanda, & ad motum blandum ducenda est, heterogenea in corde contenta eliminanda per ea, quæ materiam concretam solvere, & fluxilem reddere possunt, fibræ nerveæ irritatæ demulcendæ, spiritusque elastici redditæ ad quietem componendi, liquor pericardii nimius imminuendus, & pro viribus vacuandus, irritamenta in aliis partibus vexantia vicissim corrigenda, & amovenda, habita semper diligenti ratione virium.

XXXIV. Cum autem innumera sit remediorum sive *indicatorum* series ex fontibus consuetis *chirurgico*, *Pharmaceutico*, & *Diatetico* petitorum, generaliter saltem illa nominasse, & qui indicationibus singulis occurrendum sit, indicasse sufficiet, cum prolixius me extendere ob temporis, & paginæ angustiam non liceat.

XXXV. Ante omnia accuratè notandum est, aliud *in paroxysmo*, aliud *extra paroxysmum* agendum esse. *In paroxysmo* omni studio anniti oportet, ut motus ille depravatus compescatur, ac sistatur, prospiciendo ipsi causæ immediatæ, ubicunque demum illa delituerit: hunc in finem ex Chirurgiâ ad V. S. recurrendum erit, imprimis si à copiâ, & turgescentiâ sanguinis, aut subitaneo orgasmo malum originem duxerit, & vires adhuc integræ fuerint, quod ipsum confirmat Gal. l. 5. de



lbc: affect. ubi V. S. omnibus remediis præferendam esse asserit. De electione venarum non multum sumus solliciti, cum ex eodem trunco omnes scaturiant, in mensibus tamen suppressis vena tali majori cum emolumento tundi potest.

XXXVI. Obtinet etiam remedii hujus generosi usus extra paroxysmum, præcipuè in plethoricis, & sanguinis fermentescibilitate, seu mavis, facili exæstuatione, ita tamen, ut modus semper servetur: similiter assuetis hæmorrhoidum fluxui, iisdem subsistentibus hirudines applicari, aut aliis eadem sollicitari possunt, nec improbamus cucurbitularum cum scarificatione usum, sicubi sanguinis copia imminuenda fuerit: In sanguinis verò majori serositate, & acrimoniâ, locodictorum, Vesicatoriorum, ac fonticulorum ope, serosam colluviem imminuere studebit Medicus.

XXXVII. *Pharmacia* varia nobis suppeditat Remedia, pro ratione causarum prudenti dexteritate, cum *internè*, tum *externè* usurpanda, & applicanda. *Externè* in ipso paroxysmo regioni cordis applicantur fomenta ex melissa, salvia, ocymo, roremar. flor. 4. vulgo dictis cordialibus, item flor. calendul. spicæ, lil. convall. in vino rubro decoct. quibus deinceps spirituosæ penetrantia aspergi possunt, ceu sunt spiritus urinosi. \* c. tinct. castor. liquor C. C. succin. &c. vel parantur ex aquis appropriatis v. g. ∇ a borrag. bugloss. rosar. fl. 4. cordial. aq. cinnam. regin. Hungar. *Forestus l. 17. obs. 1.* in secretis habuit meliss. virid. & borrag. contritam tegulis ignitis impositam, & ∇ rosar. & ✕ to irroratam, cordique hinc applicatam, unde subito cordis palpitatio cessavit; Internè *Rondeletius* laudat conservam meliss. cum theriaca, ∇ de corde cervi, bovis, ∇ rorellæ c. vino destil-



destillata commendatur ab Etmullero; alii mirè commendant rhaponticum verum ad ℥ij cum vino exhibitum, aut vinum in quo radix hujus plantæ fuerit macerata; sacculi quoque ex cordialibus commode fieri possunt. v. g. ℞. rad. zedoar. angelic. ana ʒß. herb. meliss. rorismar. ana. mj. cinnam. cortic. aurant. ana. ʒij. croc. ʒj. camph. ʒß. ex incis & contus. F. Nod. vino rubro incoquendus.

XXXVIII. Emplastra alii sub mamilla sinistra non inconcinnè applicant, ex theriaca; imò refert *Clariss. D. D. Craan in Praxi medica reformata p. 237.* puerum jam in agone mortis versantem linimento ex theriaca. ☉ Card. bened. croc. & balsam. peruv. è faucibus orci liberatum fuisse. Ut jam taceam varia linimenta nervina, cardiaca, ex oleosis parata, ut oleo. caryoph. cinnam. macis, nucist. menth. camph. hyperic. succin. &c. addit. moscho regioni cordis illinenda: Hinc etiam prodest essent. ambr. c. spirit. meliss. fact. & cum appropriato vehiculo sive internè, vel externè usurpata. Si ab utero malum pullulat cucupha umbilico imposita prodest ex herbis appropriatis sic dictis parata.

XXXIX. *Internè* in paroxysmo variæ mixturæ sanguinis sive æstum refrænantes, blande alterantes, particularumq; sulphurearū ferociam infringentes, sive eundem coagulari incipientem solventes, ac discutientes, unàque fibras irritatas demulcentes, ac spiritus vitales reficientes propinari possunt: vel sub formâ juleporum, aut emulsionum distinctis vicibus sumendarum, additis absorbentibus, ac præcipitantibus, vel etiam blandis acidis scopum eundem consequi studemus, cujusmodi parantur ex aqua 4. flor. cordial. meliss. rubid. cinnam. bugloss. addit. syrup. acetos. citr. de rub. id. cum Tinct. corall. ac confect. de hyacinth. in sanguinis



**ebullitione** : è contra in ejus grumescèntia ▽ scabios.  
chærefol. veron. cum liquor. C. C. succin. spirit. ⊖ \* c.  
Essent. ambr. addit. cinnabar. aut pulv. epilept. Mar-  
chion. &c. convenientissima sunt.

**XL.** Possunt de hinc , præprimis etiam extra paro-  
xysmum , quo ad causam antecedentem , vel fomitem  
mali , aliis in partibus magis , quàm ipso corde hæren-  
tem , intentionem suam dirigit Medicus , complura alia  
ad manus sumi , quæ heïc generaliter saltem deli-  
babo.

**XLI.** Ubi vermes intestina roderint , aut materiã  
viscidã eadem fuerint fardæta , aut etiam alvus segnior  
fuerit , Clysteres ex emollientibus , & detergentibus fe-  
lici cum successu injiciuntur , similiter uti in mucagine,  
aut viscidã bile, aut acri alio fibras Ventriculi obsidente,  
ac dolorosè lancinante , vomitoria , ex tartaro emet.  
cum crem. tartari , & sale absynth. vel oxysacchar. emet.  
vel syrup. emet. Angel. Salæ cum ▽ borrag. & cinnam.  
ten. exhibita , &c. sunt præstantissima.

**XLII.** *Leniora purgantia, & abstersiva*, quibus mate-  
ria in primis viis hærens eliminatur, pori glandularum  
ab obstructionibus liberantur, remediisque dehinc ap-  
plicandis liberior , & facilior ad M. S. penetrandi via  
aperitur, suo etiam non carent usu.

**XLIII.** Ut autem visciidi , & acidi tenaces humo-  
res in hisce viis stabulantes commodius exturbari pos-  
sint , non malè vulgo dicta *preparantia* , & digestiva  
præmittuntur , quorum ope humores visciidi incidun-  
tur , fluxiles , & ad excernendum apti magis redduntur ,  
ceu sunt tartarea , crem. tartar. tartarus vitriolatus , ar-  
can. duplic. Mynsicht. ⊖ absynth. C. B. oc. 69. c. † io  
diaph. elix. P. P. dulc. elix. P. P. Paracels. essent. absynth.  
essent. cent. min. essent. Carminat. Wedel. Tinct. corall.  
Tinct. Martis aperit. &c.

**XLIV.**



**XLIV.** Humores ita præparatos, & ad exitum dispositos *purgantia* excipiunt, qualia sunt tamarindi quos D. D. Craan in specie commendat, resin. jalap. scammon. syrup. ros. solut. comp. ex S.R. & A. cum elect. de succo rosar. pulv. laxat. veget. cryst. tartari, rhabarb. elect. Mercurio d. opt. fol. sennæ, mechoacan. agaric. trochisc. habitâ semper ratione, texturæ intestinal. plus minus teneræ, & humoris peccantis, majoris, vel minoris visciditatis, quandoque enim resinosa ista graves turbas excitant.

**XLV.** In sanguinis lentore & vappescentia universim medicamentis attenuantibus, incidentibus, volatilifantibus, præcipitantibus, & absorbentibus pugnandum, quem in finem præter ea, quæ ex regno vegetabili desumuntur, inserviunt diaphoretica, & blandè sudorifera ex  $\frac{1}{2}$  io diaph. diaph. martial. solar. bezoard. miner. unicorn. foss. lap. bez. or. occ. cinnab. nat. &  $\frac{1}{2}$  ij lap. 69. C. C. phil. ppt. pulv. absorb. Wedel. spirit. C. C.  $\odot$  vol. C. C. succin. spirit. ebor. tartar. spirit. theriac. camph. fuligin. tinct. bezoard. Wedel. & simil. concinnata.

**XLVI.** Huc faciunt etiam *Diuretica*, quibus non tantum serum à  $\ominus$ bus acidis elixiviat, sed eadem quoque aliter infringuntur, & præcipitantur, vel absorbentur, ac ad vias urinarias deturbantur, sed etiam ipse sanguis edulcoratur, & motu liberiore frui incipit, possuntque hæc in *hydrocardiâ*, vel maximè locum habere, ceu sunt tinct. tart. simpl. & compos. clyss.  $\frac{1}{2}$  ij, arcan. dupl. Myns. sal. vol. succin. milleped. lumbricor. spirit. salis, lap. 69. arcan. tartari, tart. vitriol. item etiam  $\ominus$ lia diuretica, ononid. stipit. fabar. &c. decoct. item ex plantis addit. syrup. capill.  $\varphi$  is de alth. Fernel. &c. acidulæ quoque locum habere possunt, vel harum loco serum lactis



caprill. in sanguinis facili orgasmo. Usque tamen notandum circa diaphoreticorum, & diureticorum usum liberaliores esse non debere, ne nimio eorum usu sanguinem sero diluente prorsus privemus, atque ex uno extremo in alterum conjiciamus.

XLVII. In *palpitatione cordis hysterica* ea sunt præscribenda, quæ utrumque affectum respiciunt, & cordialia cum uterinis combinanda, quam ob rem commendando zedoar. & enul. campan. meliss. rorem marin. croc. succin. & hujus sal. vol. specif. cephal. diaph. mart. castor. it. hujus extract. vel etiam tinct. &c.

XLVIII. In *hypochondriaca, & scorbutica dispositione* antiscorbutica martialia & juscula ex plantis antiscorbuticis sal. volat. imprægnatis optimè habent, it. decoct. lignor. fassafr. guajac. rad. chin. sarsaparill. vel eorundem essentia, vel extracta cum appropriatis mixta.

XLVIX. Ubi *polypus* in corde hæserit, volatilibus, resolventibus diu sæpe certandum est, semper tamen cavendo, ne sanguinem nimis agitando malum augescere faciamus, unde Medicus prudenti remedium selectu, hostem hunc eliminare studebit: eundem in finem *Amuleta* ex camphora commendantur, idque non citra rationem, pollet enim insigni penetrandi vi: vel etiam *Epithema* ex spir. vin. rectific. liquor. C. C. succin. sal. vol. succ. camph. &c. paratur cordi calidè applicandum.

L. Reliquum est *Dieta*, quæ in sex rerum n. n. decenti usu consistit; *Aer* sit temperatus, purus, optimè ventilatus, *vitetur* boreal. frigid. crassus, item nebulosus, & impurus, vel *corrigatur* hic ipse suffimentis ex bacc. vel ligno juniper. mastiche, succino præparatis, si sit nimis ficcus conclave  $\nabla$ a, vel floribus impr. cordialibus, vel etiam fol. salicis &c. conspergatur. Cibi  
fiant




sint boni succi, & facilis concoctionis, in paroxysmo  
parcè comedant, sed citò reficiantur, extra paroxys-  
mum cibi sint causæ morbificæ contrarii, vitentur hinc  
crassi, fumo indurati, saliti, acidi, facile fermentescentes,  
aut ad corruptelam proni, quorum seriem apud autho-  
res vid. sis. Par ratio est *potus*, vinum crassum, tartareum,  
acidum fermentescibile exulet, vitetur vinum gene-  
rosius, & omnes spiritus nimis ardentes, &c. loco hujus  
conducit vinum tenue, vetus, roborandi, & reficiendi  
vi præditum, vel etiam parantur vina medicata, sæpe  
etiam præstat loco vini decoct. lignor. aut solius radic.  
chinæ cum tantillo cinnam. uti. *somnus*, & *Vigilia* sint mo-  
deratæ, ut statui naturali nulla inde labes accersatur;  
Idem etiam de *Motu* & *Quiete* intelligendum est. *Alvus*  
sit lubrica, menses in fœminis pariter atque hæmorrha-  
giæ consuetæ, vel hæmorrhoidum fluxus in Viris quan-  
titati, qualitati, motui, tempori, & loco solito respon-  
deant. Nec minor cura habenda est Animi pathema-  
tum, quantum enim ex horum vehementia imminet pe-  
riculi, tantum vicissim ex eorundem moderamine ægris  
accedit commodi, summa obtinet heic aureum Hippoc.  
effatum: Πᾶν τὸ πολὺ τῇ φύσει πολεμικόν τὸ δ' ἐμέτερον  
ἰσφαλές, &c. Et hæc sunt quæ pro præsentī inauguralī  
disputatione proponere volui, Deo pro summis in  
me collatis beneficiis

*Sit laus, honor, & Gloria.*

*Quid-*



  
**Q**uidquid in abstruso retinent Parnasidis antro  
Montis in Aonii degentes culmine *Musa*.  
Quid Pan, quid Nymphæ, quidquid Tibi fidus Apollo  
Quid demum Pallas, quidquid sine matre Minerva  
Abscondere aliis, nec non secreta volebant,  
Naturæq; cahos, cæcis ambagibus aucta:  
Esse Tuum voluere Dii, cognoscere causas  
Morborum varias, & dignam Pœone Prolem.  
Propugnant alii tremulum, tremulante Minerva,  
Pulsantis Cordis motum, tu spicula firmo  
Assumis vultu, intrepidusq; simillima reddis  
Hostibus, Adversis redeunt quasi Collibus icta.  
Parce Minerva! tuam jam jam tibi transfero sedem,  
Montes in Petras, & erit tibi Felsia rupes;  
Nam voluere Dii magnos vocitare gigantes.  
Dignus Apollineâ redimantur tempora Lauro:  
Sic Tibiserta parent doctæ frondentia *Musa*.  
Hoc precor, & meritos nunc & sortitus honores.

Ita vovet & gratulatur sincerè

JOH. GEORG. JOSEPH. SCHWALLER,  
Philos. & Medic. Doctor. Archiater,  
& Consiliar. Solodoran.

F I N I S.

